

'Hadiah' awal bagi atlit muda



DETIK BANGGA:
Pesilat negara, Muhammad Nur Alfian Juma'en, diiktiraf Anugerah Kepujian (Individu) di majlis Anugerah Sukan Singapura yang berlangsung di Hotel Marina Mandarin malam tadi. Seorang lagi pemenang muda bagi anugerah itu, perenang Nur Marina Chan Alif Abdullah, kini berada di Kejohanan Dunia di Kazan, Russia. – Foto TUKIMAN WARJI

► **ANWAR YAHYA**
anwar@sph.com.sg

DUA atlit muda negara – jaguh silat Muhammad Nur Alfian Juma'en dan perenang berbakat Nur Marina Chan Alif Abdullah – mendapat 'hadiah' awal sempena sambutan jubli emas negara ini apabila menyertai senarai pemenang di majlis Anugerah Sukan Singapura yang berlangsung di Hotel Marina Mandarin malam tadi.

Alfian, satu-satunya pendekar negara yang memenangi pingat emas di Sukan SEA Singapura pada Jun lalu, serta Marina – sebahagian daripada skuad renang 4x100 relay yang turut menang emas – merupakan antara 19 atlit muda dipilih bagi Anugerah Kepujian (Individu) yang disampaikan di majlis gilang-gemilang bagi mengiktiraf pencapaian atlit terbaik negara ini sepanjang tahun lalu.

"Tentunya saya bersyukur dengan anugerah ini. Ia ibarat hadiah istimewa sempena sambutan Hari Kebangsaan Ke-50 negara kita ini.

"Lebih penting lagi anugerah ini menjadi motivasi bagi saya mengibarkan bendera negara di kejohanan-kejohanan besar lain," ujar Alfian, pelajar tahun akhir di Politeknik Ngee Ann, semasa dihubungi semalam.

Siapa dapat melupakan kehebatan yang dipamerkan pendekar berusia 18 tahun itu di Sukan SEA lalu yang dicapainya dengan iringan keringat dan darah yang mengalir daripada kakinya yang 'koyak' semasa menewaskan juara dunia dari Vietnam dalam final Kelas F.

Laporan lanjut dan senarai penuh penerima Anugerah Sukan Singapura di BeritaHarian.sg

Namun, bagi Alfian, Anugerah Kepujian yang diraihnya itu – kali ketiga berturut-turut beliau memenangnya – merupakan ganjaran wajar bagi dedikasinya dalam seni mempertahankan diri tradisional Melayu itu.

Antara pencapaian utama anak bongsu empat beradik itu tahun lalu termasuk kejayaannya membawa pulang pingat emas daripada Kejohanan Pencak Silat Antarabangsa di Belanda pada Oktober lalu – medan pertamanya selepas terpaksa berehat panjang lebih tiga bulan menyusuli kecederaan serius pada tulang kaki kanannya.

"Segala kejayaan serta anugerah menunjukkan pengorbanan kami dihargai. Jadi, ia menjadi inspirasi bagi saya terus menunjukkan prestasi cemerlang di Kejohanan Dunia (yang dijadualkan tahun depan) dan tentunya berusaha mencatatkan hatrick di Sukan SEA 2017," tambah Alfian.

Kegembiraan sama mungkin turut dikongsi sama oleh Marina, yang tidak hadir di majlis malam tadi kerana menyertai pasukan renang negara yang beraksi di Kejohanan Dunia yang sedang berlangsung di Kazan, Russia.

Anak tunggal dalam keluarganya itu melalui jadual pertandingan yang sibuk tahun lalu termasuk beraksi di Sukan Komanwel Glasgow, Sukan Asia Incheon, Sukan Olimpik

Belia (YOG) di Nanjing serta kejohanan Piala Dunia Persekutuan Renang Antarabangsa (FINA) yang berlangsung di Pusat Akuatik OCBC.

Dianjurkan Majlis Olimpik Kebangsaan Singapura (SNOC) dan Sukan Singapura (SportSG), dengan disokong ToteBoard, majlis yang turut mengumumkan pemenang utama – Olahragawan dan Olahragawati negara – turut diserikan kehadiran Menteri Pembangunan Sosial dan Keluarga yang juga Presiden SNOC, Encik Tan Chuan-Jin; serta Menteri Kebudayaan, Kemasyarakatan dan Belia, Encik Lawrence Wong.

Encik Tan, dalam ucapannya di majlis semalam, turut mengiktiraf pencapaian hebat atlit negara sepanjang tahun lalu.

"2014 adalah tahun yang tidak dapat dilupakan bagi sukan di Singapura. Atlit kami memenangi pingat di tiga temasya sukan utama serta di kejohanan antarabangsa lain.

"Rekod sukan dan rekod nasional turut dicipta di Sukan Komanwel dan Sukan Asia. Di Sukan Olimpik Belia (YOG), atlit muda kami mencipta sejarah dengan memenangi pingat emas pertama Singapura. Lebih penting lagi ialah melihat atlit mencabar diri sendiri bagi mencatatkan pencapaian peribadi terbaik masing-masing. Anda semua menjadi kebanggaan Singapura," ujar Encik Tan.



KHAMIS 06-08-15